

欽定八旗通志卷一百四十五

人物志二十五

大臣傳十一

滿洲鑲黃旗十一 端濟布 明瑞
博清額 福隆安 豐昇額

端濟布

端濟布滿洲鑲黃旗人姓瓜勒佳乾隆八年由前
鋒授藍翎侍衛洊授二等侍衛二十年台吉巴雅
爾等投誠

命端濟布齎衣物往

賜之還授頭等侍衛遷鑲黃旗察哈爾總管二十一年
命選兵千赴西路軍營剿賊二十二年三月隨將軍兆
惠由朱爾圖斯進兵四月至瑪納斯擒得木齊鄂
羅斯獲其屬三百馬駝牛羊二千餘六月扎哈沁
叛賊巴哈曼集遁端濟布偕侍衛奎瑪岱追剿至
小衛和勒津遇前掠臺站賊扎木布擒之招降巴
哈曼集屬二百餘戶九月擒叛賊噶爾藏多爾濟
宰桑羅卜扎尼瑪得木濟敦多克於羅克倫孟古

圖領送巴里坤先是布魯古特台吉璉齊呼爾瑞
台吉達瓦斬叛賊扎那噶爾布詣端濟布營詐降
並請招叛黨額林沁達瓦端濟布信之遽撤兵還
璉齊等尋遁

上命靖逆將軍雅爾哈善查明治罪至是

諭曰端濟布此次所辦尙合機宜從前招降惟事姑息
已命查明治罪今功過相抵著加恩寬免十月扎哈
沁得木齊哈勒拜等謀掠臺站叅贊大臣哈寧阿

檄端濟布往剿至瑪納斯擒謀十餘渡河至美羅
托山賊遁收其游牧牲畜

詔相機速剿二十三年正月叙功列一等六月分領青
林額魯特兵圍庫車賊三千自賽里木來援據高
阜端濟布同侍衛順德訥等分翼奮擊斬首二千餘
獲畜械甚衆七月復同侍衛齊凌扎卜等剿賊之
逃往蘇巴什山者三百餘八月邀擊城內遁賊於
鄂根河十月大兵分三路攻葉爾羌回首霍集占

築臺城東北端濟布以右翼後隊攻之賊拒戰我
兵擊斃賊二十餘賊退入城時將軍兆惠被圍於
黑水端濟布轉戰十餘至呼爾璦合兆惠軍二十
四年二月

敕部優叙給三等輕車都尉世職四月授鑲紅旗滿洲
副都統七月隨大軍追賊至阿爾楚爾及伊西洱
庫爾淖爾端濟布以兵二百截其逃路偵賊寨山
巔越嶺攻之被創事

聞下部議叙凱旋

賜塔什巴圖魯號

命圖形

紫光閣

御製贊曰將軍黑水先衆徑度固營待軍實端濟布衆寡稍挫倉卒周防奪回人馬勇且謀長二十六年卒

贈都統銜

諭曰端濟布前在軍營頗著勞績且打仗受傷得有殘

疾回京身故定例惟陣亡人員始入昭忠祠端濟布
雖非陣亡但念其久在軍營効力打仗得傷回京身
故與陣亡者無異著加恩准入昭忠祠尋

賜祭葬諡壯節子伊達禮襲世職

明瑞

明瑞滿洲鑲黃旗人姓富察一等承恩公富文子
乾隆十四年由官學生襲世爵授二等侍衛二十
一年四月管理健銳營五月

命以副都統銜赴西路軍營充領隊大臣時阿睦爾撒
納叛竄哈薩克明瑞隨定西將軍達勒黨阿追之
再與哈薩克戰多斬獲

上嘉其奮勇行陣授副都統二十三年四月追擊推素
隆集賽逃人八十餘戶降之殲其拒戰者收駝馬
軍器得

育嘉獎十一月授戶部右侍郎二十四年三月授叅贊

大臣

御前侍衛尋

諭曰明瑞自到軍營凡遇陣戰領兵奮勇行走可嘉加
恩於現襲公爵加賞毅勇字號授爲承恩毅勇公五
月隨將軍兆惠剿逆回霍集占於葉爾羌叙功

賞雲騎尉世職八月追賊於和斯庫魯克山賊衆六千
餘負嵎固守我兵九百奮勇鏖戰賊大敗尋復恃
其馬力來拒陣斬賊五百餘級生擒及傷竄者無
算

諭曰覽奏我師以寡敵衆力戰敗賊實屬奮勇効力朕心甚爲嘉悅著交部從優議叙復

賜御筆詩扇曰世胄更勲戚少年能老成從軍俾習事
屢戰得英聲適以狂狙遯因將勁旅征欲遮先信漏
不捨竟踪橫地利雖非擅人和我實勍騎惟九百到
賊乃數千迎少卒勝其衆勇還濟以誠勗哉俘二豎
衛霍遜功名十月

賞戴雙眼翎二十五年四月奉

旨明瑞所得之雲騎尉與伊弟奎林承襲明瑞仍承襲
一等承恩毅勇公世襲罔替二十六年伊犁回部功
成

命圖形

紫光閣

御製贊曰椒室懿親年少志雄謂可造就俾學從戎獨
出獨入旣忠且壯屢立宏勲愜予所望五月授正白
旗漢軍都統尋轉戶部左侍郎二十七年三月

詔赴伊犁九月授領侍衛內大臣十月授伊犁將軍二
十八年三月叙平定準噶爾及回部功給騎都尉
時哈薩克汗阿布勒比斯來索逃回伊犁之額魯
特明瑞以準噶爾已平額魯特等投回伊犁乃其
故土斥責之并請

赦下烏里雅蘇台將軍一體辦理

諭曰明瑞所辦甚爲得體從前雖無彼此不留逃人之
言但成衮扎布曾將自哈薩克逃出之額魯特給回

阿布勒比斯遂欲援以爲例著傳諭成袞扎布等嗣後遇此等事俱照明瑞等所辦駁之先是明瑞面奉諭旨籌辦塔爾巴哈臺駐兵事宜至是奏言屯田兵應駐雅爾城留馬兵三百照管貿易餘馬兵一千二百交領隊大臣於週圍巡查雅爾與伊犁多往返文移請自額敏河沿自巴爾楚克沁達蘭設大卡倫三各駐兵三千其庫克托木嶺等處酌安卡倫則塔爾巴哈臺一帶聲勢相接現今烏嚕木齊駐兵

較多於巴里坤請將二處辦事大臣撤回巴里坤
提督移駐烏魯木齊烏魯木齊兵移駐巴里坤奏
入

詔以烏魯木齊大臣移駐雅爾餘如所請二十九年四
月奏請伊犁添設理事同知從之十二月疏言雅
爾等處駐兵屯田所需器具於綠旗兵內挑選匠
作購辦物料以備臨時添補輓車輛之馬俱於牧
羣撥用報

閏三十年二月烏什小伯克賴黑木圖拉等聚衆五百
餘乘夜縱火焚掠據城爲變明瑞派副都統觀音
保往援旋聞駐烏什副都統素誠自戕卽親統兵
進時叅贊納世通先帶兵至烏什之鄂托巴什觀
音保至納世通派守隘不令進勦復行文止明瑞
兵明瑞慮觀音保兵旣撥防其進勦兵半係回人
及布魯特不可恃仍統兵進秦人

上以所辦甚合嘉之三月抵烏什賊衆二千餘來犯明

瑞與觀音保等擊之奪臺七殺賊二百餘俱傷入城山險城堅明瑞設防困之復遵

旨查奏素誠狂縱激變及納世通凌辱回衆副都統并塔哈掩飾兵敗狀

命尙書阿桂赴烏什傳

旨將納世通并塔哈正法賊困守既久謀殺襲大營我軍偵知之預設備賴黑木圖拉中前死賊復推其父額色木圖拉爲阿奇木悉衆死守不敢出明瑞

簡巴圖魯六百餘中夜携雲梯分道潛往薄其城
先登東北隅賊未覺挺刃交下守陴賊驚竄卽舉
火招繼進者循城北至東南毀其堞天明收軍仍
逼城築壘斷其樵汲賊城糧盡遂內潰八月疏報
克復烏什城

上以所奏簡畧

敕明瑞阿桂將入城擒賊情形逐一奏聞尋會奏領兵
築築圍城原充烏什商伯克沙布勒縛首逆額色